

100 ЕГДЕН QАЗАҚСТАН

Ұшқыр ойлар ұшқындары

Газет жасаудың, газет шығарудың қызық-шыжығы әрдайым қат-қабат жүрсе керек. Қалам мен қағазды серік еткен журналист ағайындардың арасында «Газеттің өзі – бір күндік, ал сөзі – мың күндік» деген тамаша тәмсіл бар. Өте орынды. Жүз жылдық шежіреге айналған «Егемен Қазақстанның» сарғайған беттерін параптаған сайын бұған көзің қаныға түседі-ау. Талай тағдырлардың, талай қаламгерлердің қолтаңбалары шертер сыр да көп-ақ. Жанкешті журналистердің тіршілік-тынысынан хабар берер редакцияның сырт оқырманға беймәлім ішкі «кухнясы» өзінше бір әлем. Әр жылдары, әрқиылды жағдайларда газет қызметкерлерінің табандада суырып айтқан ой ұшқындарын, астарлы өзілдері мен қуақы қалжындарын өзек етіп өрген алақандай әңгімелер шоғырын басылымның ғасырлық тойына арналған нөмірінде жариялауды жөн көрдік.



Семсер шумак

Қолына қалам ұстағандар жақсы білсе керек. Газеттің әдебиет бөліміне адамдар көп келеді. Өйткені қалыптасқан қаламгерлерден гөрі шатып-пұтып, тіпті өздері шимайлаған жазуларын өздері ажырата алмай қинайтындар жиі есік ашады.

– Өлең жазып едім, – дейді бірі.

– Естелігімді газетіңе жарияласаң, – десе екіншісі, үшіншісі бұйыра, міндетси сөйлейді.

Оның да жөні бар. Шетінен «жазғыштар». Бәрімен тіл табысуға тырысасың. Әйтпесе, райкомнан бастап, үлкен үйге – ЦК-ға дейін үстіңен құлаштай-құлаштай арыз жазып жібереді. Әрине, «арпа ішінде бір бидайы» ұшырасқан

тәуір өлеңдер арагідік газет бетін көреді. Онда да өндөліп. Осындау «ақынсымақ» – әдебиет бөлімінің меңгерушісі, сыншы Зейнолла Серікқалиевтің басын әбден қатырады. Кеңесіне құлақ аспай, ескертпелерін елең қылмай өз айтқанынан қайтпай сынәрезуленіп мыжи береді, мыжи береді.

- Жарайды, шырағым. Өлеңінді басқа бір газетке бастырыныз, – дейді Зейнолло шыдамы таусылып.
- Бастырсаң, бастырам. Сіз өлеңді түсінбейсіз, сыншысыз ғой, – дейді даукес қиқар жігіт «кудігін» көмейінен ағытып.

Осы кезде шытынап жарыларға шақ тұрған Зекен Махамбет бабасынша семсер жырын төгіп-төгіп жіберіпті:

*Бас сүйегіңді саудыратып,
каска етсем деп едім,
Бет теріңді сынырып an,
маска етсем деп едім,
Кеңірдегіңді суырып an,
шлангі етсем деп едім,
Құлагыңды жұлып an,
ләңгі етсем деп едім!*

Көзі шарасынан шыққан көкезу ақын дауды одан әрі өршітпей үнсіз қалыпты. Ойы – әлем-тапырық.

«Ауруханаға жата алмадым-ау...»

Қамшының сабындағы қысқа ғұмырдың көмбесі бұландағанын әр жүрек түрліше сезеді-ай. Біреуге ұзақ, біреуге шолақ қас-қағымдық сэт. Біразымызға жастық шақ өтпейтіндей, қарттық кезең қуып жетпейтіндей көрінері де аян. Сөйтсе де уақыт, шіркін, өзінің үстемдігін ерте ме, кеш пе байқатады.

Үлкен мекеме болғандықтан «Социалистік Қазақстанның» шаңырағында да той-томалақ көп. Қызметке қабылдаудан бастап, қызметтен шығарып салуға дейін... Шілдеханадан бастап, құрметті еңбек демалысына дейінгі үлкенді-кішілі шаралар елеусіз қалмайды. Сапар Байжанов тізгінің ұстап отырған кезде іркес-тіркес бірінен соң бірі зейнет жасына толған газет ардагерлерін зейнеткерлік демалысқа әспеттеп ұзатып салу салтанаты жылдан-жылға үласқаны бар. Әншейінде «Алпысқа аман-есен жетсем, бір күн де

отырмаймын. Арызымды берем де – кетемін» дейтін агаларымыз мезгіл сағаты соққанда басқаша сайрайтын болды.

«Жарты жыл жүре тұрайық та».

«Құжаттарым әлі дайын емес».

«Ұлы Женіс тойын өткізіп бір-ақ шығайын».

«Әзірге денсаулығым жақсы, қол қусырып үйде қалай отырам».

Мінеки, осындай ұсак-түйек жосықсыз сылтаулар айды айға жалғайтын. Ал бұдан гөрі маңыздырақ, бұдан қажеттірек жағдайларды екі-үш жыл ертерек тастай ғып шешіп қоятын-ды. Ардагер медалін алу, құрметті атақ алу, пәтерін кеңейтіп алу, машина алу... Алды жұмсақ, терісі кең, келешегін күнілгеріден ойлайтын Сапекен де болымсыз жерге пышақ ұра бермейтін. Көңілі түссе – көл. Обалы нешік, кейде анқылдаپ, ақтарылып күліп алады да, «жарайды сәл шыдай тұрайық» дегендег мінез танытатын. Осы тәрізді кең қолтық жайды зейнет жасына жеткен ардагер журналист Әбдібек Нұрмамбетов ағаға да көрсетті. Алты асқарға алқынбай келген Әбекеңнің қас-қабағын бағып, көңіліне қаяу түсіріп алмауды ойлайды. Орайлы, оңтайлы лездеме үстінде:

– Әбеке, документтерінізді тездетіп реттеніз, – дейді жымып. – Рахаттанып бір демалмайсыз ба? Өстіп шаршап-шалдығып, тұнімен баспахрананың қорғасынын жұтып жүресіз бе? Одан да Торғайыңыз бер Қостанайыңызды емін-еркін араламайсыз ба? Сіздің орныңыдан, яғни бөлім менгерушілігінен дәметіп жүрген жігіттер бар, жастар бар.

– Құжаттарым обкомпрофсоюзда жатыр. Орнымды інілеріме бермегенде кім-ге береді дейсің. Алып кетпеймін ғой...

– Дұрыс, Әбеке. Аландамаңыз...

Әбдібек аға аса кірпияз кісі. Пандығы басым. Ұзын бойлы, тіп-тік жүреді. Ақырын, ернін жыбырлатып, сыбырлап сөйлеседі. Сәлемдескені де бөлекше қызық. Жұрт секілді алақанын толтырып амандаспайды. Селқос саусақтарының ұштарын алақаныңа тигізіп қана сәлемдеседі. Үнемі орден-медальдарын саудыратып тағып алады. Ерінбей-жалықпай бір костюмнен екіншісіне қалай ауыстырып тағады екен деп ойлаймыз.

Әлден кейін Әбекен күпті ойын білдірген:

– Сапар, мен тағы екі-үш ай жүре тұрайыншы.

– Не боп қапты Әбеке?! Онсыз да жарты жылдан асып кетті емес пе?

– Совминнің Шевченко көшесіндегі жаңа ауруханасы күзге таман бітеді екен. Соған бір ай жатып алайын. Пенсияға шығып кетсем, мүмкіндік бола қоймас.

– Ой, Әбеке-ай, өзініз қызық екенсіз ғой. Дербес зейнеткер ретінде, соғысқа қатысушы ретінде Совминнің ауруханасына бірінші кезекте тіркелесіз. Әлі-ақ талай мәрте жатасыз денсаулық болса, – дейді риясыз шек-сілесі қатқан Сапекен.

Көкейдегі күдік бұлтын сейілткен күлкі Әбекеңнің еңсесін бұрынғыдан бетер көтере түскендей:

– Жарайды. Жұмыстан кетсем бәрінен кететіндей қиналып жүргенім рас еді, – депті.

Сенімді өкілдер

Журналистер үшін ең жауапты міндеттердің бірі – кезекшілік. Арнаулы тақтаға алдын ала іліп қойған секретариаттың тізімінен қай күні кезекші болатыныңды біліп, тастүйін әзір жүресін. Ұйқынды қандырып, жақсылап тынығып алуды ойлайсын. Күнделікті күйбең тіршіліктегі қолбайлау аланнадарлық жайттардың көлденендеуіне мән бересін. Ең ақыры, бұл күні қонаққа бармайтыныңды, я болмаса қонақ шақырмайтыныңды бүкіл отбасың сезіп отырады. Балғабек Қыдырбекұлының қатаң қағидасы: «Кезекшілік – жауынгерлік пост!». Осы кезекшілікті өткізу дегі жігіттердің әрқайсысының бір-біріне ұқсамайтын өз тәжірибесі, өз стилі, өз пайымы бар.

Бірі газеттің алғашқы бетінен бастап, соңғы бетке дейін үтір, нұктесін қалдырмай қалт-құлт дірілдеп, өзіне-өзі сенімсіз сүзіп оқиды. Екіншісі саяси, ресми материалдарды ғана аса мән бере оқып, қатардағы үлкенді-кішілі өзге дүниелерді атусті жорта шолып шығады. Ал енді біреулері тек бірінші беттегі кездесетін ресми адамдардың лауазымдары мен қызметтерін әлденеше мәрте тексеріп, салыстырып оқуды дәстүрге айналдырған. Әрине, олардың барлығы да негізінен корректорларға арқа сүйейді. Бұл – жасырын емес. Мәселен, Ақселеу Сейдімбеков кезекші болған күні корректор қыз-келіншектер өз беттеріне әдептегіден де сергек, бұрынғыдан да жинақы әрі жауапты қарайды.

– Кәне, беттерің әзір болса әкеліндер. Қол қойып жіберейін, аса мәртебелі менің сенімді өкілдерім. Қате жоғына көздерің анық жетсе бопты, мен несіне шүқшиып оқимын, – дейді әр іс-әрекеті мен қимыл-қозғалысы өзіне жарасатын сері Ахаң емен-жарқын материалдардың тақырыптарын шолып.

Бұдан соң сенімді өкілдердің өздеріне көрсетілген құрмет пен жауапкершілікті барынша абыраймен орындауга ұмтылатыны белгілі емес пе?!

Балық

Ел бірлігі, тіл тағдыры, жер жайындағы көкейкесті проблемаларды ұдайы көтеріп жүретін «Егеменнің» бас редакторы Шерхан Мұртаза әсте қажыған емес. Әлде кімдер секілді «көпіртпе» сөзді уақытша ұпай түгендеудің есебіне айналдырмағаны және аян. Қаламгерлік кредосы санайтын ол ашы да өткір ойларын үнемі жазып, ұдайы айтып келеді.

Осындай бір жамбылдық жерлестерімен жүздесуде шамырқанған жазушы жанын жегідей жеп жүрген мәселелердің қатпар-қатпарын қопара, тіліп-тіліп сөйлеген. Халықтық қалпының берін адамгершілік асыл қасиеттерімізге кіреуке түсірер кесапттарды алдаспан сөзімен отаған ол имандылық, қатыгездік, жемқорлық жөнінде айта келіп, ана тіліміздің тағдырына ойысқанда қордалы ойын былайша түйген:

– Қайсыбірін айтарсың. Әлгіндегі індеттердің бәрі біртіндеп жойылар. Жанымның езіліп, жүргімнің жылайтыны – қазақ тілінің келешегі. Туған тілінен айырылған халық – судағы балық. Ал мақау, меніреу балық-ғұмыр кімге керек!? Ойланындар!

Шындығында бұған дейін көбіміздің басымызға келмеген ой. Жапыраған жүрт ілкі сәт сен соққан балықтай үндеңей қалған еді.

Таптырмайтын сурет

«Егемен Қазақстан» газетінің Талдықорған облысындағы меншікті тілшісі, журналист Сейдахмет Мұхаметшин балуан денелі зор кісі. Сондықтан да оны жерлестері әзілдеп «полтара қазақ» атап кеткен. Сол «полтара қазақ», қасында ақсулық фототілші Ахмет Тегінбаев бар, бір топ әріптестерімен бірге Ақсу өзеніне шомылып жүреді. Байқаусызыда аяғы тайып кеткен Сәкенді арынды өзеннің қатты ағысы қақпақылдан ағыза жөнеледі. Қорқыныштан ауыр денесін көтере алмаған ол жанталасып, жағаға ұмтылады. Үрейлі даусы да дірілдеп шығып кетсе керек.

Мұны көрген фототілші Ахмет жүгіріп барып фотоаппаратын алады да өзен-ді жағалап, шыртылдатып түсіре бастайды.

– Таптырмайтын сурет. Нағыз шынайы көрініс, Сәке, сәл шыданыз.

Әйтеуір, дәу бір қойтасқа барып аяғын тіреген Сейдахмет жан-дәрмен күйде бойын әрең тіктейді. Жаны мұрнының ұшына келген ол Ахметке дүрсө қоя береді:

– Ей, әңгүдік, сенің таптырмайтын суретің не? Масқара болғанда тұра көз алдында суға кетіп қала жаздаған жоқпын ба?

– Шынымен-ақ қорықтыңыз ба? Мен сізді, Ақсұдың кез келген тұсынан жалдап өте шығады десем. Қарасаңызшы тұрған жерінізді, тізенізден де келмейді ғой, – дейді Ахмет шек-сілесі қатып.

«Полтара қазақ» соңда барып өзенің нақ ортасында тұрғанын байқайды. Қөнілі жайлланған Сәкең балаша қарқылдан күліп жібереді.

Алып аңқау келеді деген осы да.

Мен үйге жеткенше

Журналист Тәжібай Битайдың жанынан табанда екі шумақ өлең шығару өнеріне қоса, жатыптар бірқақпайлары да бар. Бірде Тәкең жұмыстан ерте кетіп бара жатса керек.

Мұны көрген қаламдастарының бірі:

– Оу, Тәке, әлі ерте емес пе, – дейді.

Сонда Тәкең сағатына қарап:

– Неге ерте, қазір міне бес болыпты. Мен үйге жеткенде сағат тұра алтыны шертеді, – деген екен.

Жылап оқитын нөмір

...Әр нөмірді сәтті әрі оқылатындай дәрежеде шығару оңай емес. Көзіқарақты кез келген жан өзіне қажеттісін теріп алады. Соңдықтан бастан-аяқ сүрініп жататын тәуір дүниелер болмаса да, жылтыраған, жілігі татитын екі-үш мақаланың жүруі шарт. Құн сайын ертемен Ерағаның бөлмесінде бас қосатын нөмірге тікелей қатысты редакторат мүшелері қоржындарында дайын тұрған үлкенді-кішілі материалдарды ортаға сарапқа салады. Құндегі әдет. Бірде бар, бірде жоқ дегендей мандайынан шертіп жүріп іріктеп алар, елең еткізер мақалалар ұдайы табыла бермейді-ау. Амалсыздан өзімізді-өзіміз алдаусыратып, кей құндері сегіз бетті түгелімен сүреңсіз, әлжуаз бірденелермен толтырамыз. Мұндайда мерейтойлық кіл мадақ мақалалар мен алдын ала ақшасын төлеп қойған жарнамалық материалдың тығыны ашылып кететіні және бар. Сөйтсе де қармаққа әлдене іліккендей.

– Жақсы дүниелер әжептәуір секілді ғой, – алдындағы жоспардың нобайына үніле жанар жүгірткен Ержүман Смайылдың үні жарқын естілген. – Сын мақала да, жазушы толғанысы да, «Әйел әлемі» де бар екен.

– Иә, Ереке, менің қолыма кеше кешкісін келіп түсті... Темір Құсайынның шенеуніктердің қызмет этикасы туралы өткір мақаласын бүгін салып жіберсек қайтеді, – деді Жанболат.

- Мына шағын ғана «Қаның қалай қайнамас?!» пен Әбдірәлі Бөлебайдың «Жемқорлық өршіп тұр» деген сыйның да бірінші беттен бастайық, – деді Еркін Қыдыр қолындағысын көрсетіп.
- Жарайды. Ұстап отырмай салып жіберейік. – Ерағаң шырайлы жүзін Жұмагұл Солтиеваға аударып: – Осы жолғы «Әйел әлемінде» оқылатын не бар?
- Жаман емес. Гүлзейнеп те, Айнаш та, Ділдар да оқылады. Авторлардың мақаласы да тамаша. Бірақ... бәрі де шетінен ауыр өмірді, қын тағдырды, келенсіз көріністерді тілге тиек етеді. Оның үстіне басқа бөлімдерден ұсынып жатқан дүниелер де өңкей сын, өткір, жылаңқы мақалалар екен, – деді Жұмагұл күдіктене.
- Жұмеке, несіне қиналасыз. Қайта ертеңгі нөмірді оқырмандарымыз жылап отырып оқымай ма? – деді Еркін дереу тық еткізіп.
- Бұл пікірді өзгелеріміз жапа-тармағай қолдап кеттік.
- Мүмкіндікті жібермейік. Жылап оқитын нөмірге не жетсін, шіркін!...
- Мейлі.
- Бізге керегінің өзі осындай нөмір емес пе?!

Қаптап кеткен өнеге

Күнделікті кешкі бет қарау кезінде алдында жатқан беттерді сүзіп шолған Сауытбек соңғы бетке үнілген бойда:

- Мына «Өнеге» деген айдарды өзгертіндер, – деді секретариаттың жігіті Маратқа қарап.
- Сәке, оригиналында солай екен.
- Дұрыс қой, бірақ екінші бетте де, бесінші бетте де «Өнеге» бол жүр ғой. Бұл рубриканы келешекте көрінген материалға, көрінген суреттемеге сыналай бермеу жағын ойластыралық. Жақсы сөздің салмағын жеңілдетіп алмаған жөн. Жазып жатқан адамдарымыздың бәрі бірдей, билетініміз бар, білмейтініміз бар, шетінен өнегелі ме, осы? Ә...

Рас-ая!

«Аяқ кесу»

Бас редактордың бөлмесі. Ертеңгілік макет бекіту кезі. Жанболат Аупбаев, Еркін, Жұмагұл, Самат рет-ретімен сызылған беттердің нобайларымен танысып, әр материалға, әр айдарға жіті үніліп отырған. Тақырыптарда сөз қайталаулар жоқ па? Күтілетін материалдарға қалдырған орындар жете ме? Рес-

ми дүниелерден не берілмек? Шығып бара жатқан нөмірдің жіп-шуын ықтияттап, түгендеп дегендей редакторат мүшелері өз ойларын ортаға салып пікірлесуде.

– Меніңше бәрі дұрыс сияқты. Ұмыт қалған, күйіп тұрган ештеме жоқ. Бірінші беттің макеті дұрыстау еken. Шамамыз келсе осыны сақтап, бұзбауға тырысайық. «Айтайын дегенім...», «Бір ауыз сөз», «Масқара!» тәрізді айдарлардың бәрі қамтылған көрінеді. Өзге беттердің де ажары мен мазмұны тәуірлеу...

Макетке көңілі толған Жанболат орнынан түрегеліп, қызылды-жасылды сзыылған беттерді қайта бір қарап шықты. Осы кезде күн ұзақ ұн демей, тыныш отырған Айдарбек күмәнді ойын білдірген:

- Тек, мына бір Жұмагул апайдың «Сөз бен іс» деген мақаласы сыймай қалуы мүмкін. Сондықтан бірінші беттен бастап, аяғын соңғы бетке шығардық.
- Дұрыс жасағансың. Өзі не туралы еді.
- Баспасөзге жазылу жайында...
- Е-е... жарасы жеңілдеу еken. Онда Айдош, сен былай істе. Жұмагул апаңың аяғы сыймаса, беттің үстінде ептең қысқартып көр. Байқайсың ғой, эйтесінде, аяғын шорт кесіп тастап жүрме. Сылтып қалмасын, – деді бас редактор жымыңдал.
- Мейілдерін, өздерің білесіңдер, – деді Жұмагул де өзіл астарын түсініп.

Жанат ЕЛШІБЕК